

四庫全書

史部

欽定四庫全書

史部

欽定續通志卷五百十一

侍講學士_臣羅國俊覆勘

總校官原任侍講_臣王燕緒

欽定四庫全書

欽定續通志卷五百十

忠義傳

五代

臣等謹案歐陽修五代史死節傳序謂得全節之士三人死事傳序謂士不幸生其時欲全節而不能立傳者馬彥超宋令詢李遐張彥卿鄭昭業

五人見於本紀則其搜羅亦云博矣獨以不為韓
通立傳貽譏而宋史因有周三臣傳顧以李筠李
重進附之謂洛邑頑民非殷之忠臣乎亦猶五代
史死事傳序所謂樂成其美而不求其備之義云
爾茲合而輯之次其時事別以劉仁瞻孫晟二人
歸入南唐載記補為五代忠義傳一卷

王彥章

張源德

裴約

夏魯奇

姚洪

王思同

張敬達

翟進宗

沈斌

王清

史彥超

韓通

李筠

李重進

王彥章字子明

舊五代史作字賢明壽張縣人

鄆州壽昌人少為軍卒

事梁太祖為開封府押衙左親從指揮使行營先鋒馬

軍使末帝即位遷濮州刺史徙澶州彥章驍勇有力能

跣足履棘行百步持一鐵槍

按通鑑作每戰用二鐵槍一置鞍中一在手中與此

小騎而馳突奮疾如飛他人莫能舉軍中號王鐵槍梁

晉爭天下為勁敵獨彥章心輕晉王謂人曰亞次

通鑑作亞

子關雞小兒耳何足懼哉梁分魏相六州為兩鎮懼魏

軍不從遣彥章入屯金波亭以虞變魏軍果亂夜攻彥

章彥章南走魏軍降晉晉軍攻破澶州虜彥章妻子歸

之太原間遣使招彥章彥章斬其使以自絕然晉人畏

彥章在梁必欲招致之待其妻子愈厚

按通鑑作彥章斬使者晉人盡

滅其家與此異

自梁失魏博與晉夾河而軍彥章常為先鋒遷

汝鄭二州防禦使匡國軍節度使北面行營副招討使

又徙宣義軍節度使是時晉已盡有河北以鐵鎖斷德勝口築河南北為兩城號夾寨而梁末帝昏亂小人趙巖張漢傑等用事彥章謀不見用龍德三年夏晉取鄆州梁人大恐宰相敬翔顧事急以繩內靴中見末帝而泣引繩將自經末帝使人止之問所欲言翔曰非用彥章不可末帝乃召彥章為招討使以段凝為副問破敵之期彥章對曰三日左右皆笑受命而出馳兩日至滑州置酒大會陰遣人具舟於楊村命甲士六百人皆

持巨斧載冶者具韞炭乘流而下酒半佯起更衣引精
兵數千沁河以趨德勝舟兵舉鎖燒斷之因以巨斧斬
浮橋而彥章引兵急擊南城果三日而破時莊宗在魏
聞彥章為招討使驚曰彥章驍勇吾嘗避其鋒守將朱
守殷非其敵也即馳騎救之比至而南城已破矣莊宗
撤北城為柵下楊劉與彥章俱浮於河各行一岸每舟
柵相及輒戰一日數十接彥章至楊劉攻之幾下晉人築
壘博州東岸彥章遂不能克還擊楊劉敗時段凝已有異

志與趙巖張漢傑交通懼彥章剛直協力傾之其破南城也彥章與凝各為捷書以聞凝遣人告巖等匿彥章書而上已書使者至軍獨賜勞凝而不及彥章軍士皆失色及楊劉之敗也凝乃上書言彥章使酒輕敵而至於敗趙巖等從中日夜毀之乃罷彥章以凝為招討使唐兵攻克州復召彥章使守捉東路時梁之勝兵皆屬段凝京師祇有保鑾五百騎

按通鑑作保鑾騎士及他兵合萬人與此異皆

新募不可用乃以屬彥章又使張漢傑監之彥章至遞

坊以兵少戰敗退保中都再敗與其牙兵百餘騎死戰
唐將夏魯竒識其語音曰王鐵槍也舉稍刺之彥章傷
重馬踣被擒莊宗見之曰爾常以孺子待我今日服乎
又曰爾善戰者何不守兗州而守中都中都無壁壘何
以自固彥章對曰大事已去非人力可為莊宗惻然賜
藥以封其創彥章武人不知書常為俚語謂人曰豹死
留皮人死留名其於忠義蓋天性也莊宗愛其驍勇欲
全活之使人慰諭彥章謝曰臣與陛下血戰十餘年今

兵敗身窮不死何待且臣受梁恩非死不能報豈有
朝事梁而暮事晉生何面目見天下之人乎又遣明宗
往諭之彥章病創卧不能起仰顧明宗呼其小字曰汝
非邈佶烈乎我豈苟活者遂見殺

按通鑑帝發中都拜
彥章自隨遣中使問

曰吾此行克乎對曰段凝有精兵六萬雖主將非材亦
未肯遽爾倒戈殆難克也帝知其終不為用遂斬之與
此異

張源德本晉人少事晉無所稱從李罕之降梁太祖時
自金吾衛將軍為蔡州刺史貞明三年末帝遣劉鄩將

兵屯魏源德為守貝州遇魏博軍叛晉王入魏襲破德州以兵五千攻源德源德堅守不下晉軍塹而圍之已而劉劼大敗於故元城南走黎陽晉軍攻破洺州衛邢以城降磁相滄皆棄城走當此時晉已先下全燕而鎮定又附於晉自河以北山以東四面千里六鎮數十州之地皆歸晉獨貝一州圍之踰年不可下貝人食且盡乃勸源德出降源德不從遂見殺貝人謀曰晉圍吾久吾窮而後降懼皆不免也乃告于晉曰吾欲被甲執兵

而降得赦而後釋之如何晉軍許諾貝人三千出降已

釋甲晉兵四面圍而盡殺之

按通鑑源德聞河北皆為晉有欲降謀于其眾眾以

窮而後降恐不免死不從共殺源德嬰城固守城中食盡乃請環甲執兵而降此蓋傳聞異詞且主將已死誰與固守者似于情事未合今仍歐史原文附識於此

裴約潞州牙將守澤州值昭義軍節度使李嗣昭卒其子繼韜以澤潞叛降於梁約召其州人泣而諭曰吾事故使二十餘年見其分財饗士欲報梁仇不幸早世今郎君父喪未葬違背君親吾能死於此不能從以歸梁

也衆皆感泣梁遣董璋率兵圍之約與州人拒守求救於莊宗是時莊宗方與梁人戰河上聞繼韜叛頗有憂色聞約獨不叛喜曰吾於繼韜何薄於約何厚而約能分逆順邪顧符存審

通鑑作李紹斌

曰吾不惜澤州與梁獨愛

約一州易得約難得也爾識機便為吾亟取約來存審以五千騎馳至遼州而梁兵已破澤州約見殺

夏魯奇字邦傑青州人唐莊宗時賜姓名曰李紹奇魯奇初事梁為宣武軍校後奔晉為護衛指揮使從周德

威攻幽州劉守光將單廷珪元行欽以驍勇自負魯奇
每與二將鬪輒不能解兩軍皆釋兵而觀晉已下魏博
梁將劉鄩軍洹水莊宗以百騎覘敵遇伏兵圍之數重
幾不得脫魯奇力戰手殺百餘人身被二十餘創與莊
宗決圍而出莊宗益奇之以為磁州刺史從戰中都擒
王彥章拜鄭州防禦使遷河陽節度使為政有惠愛徙
鎮忠武河陽人遮留不得行父老詣京師乞留明宗遣
中使往諭之乃得去唐師伐荆南以魯奇為招討副使

無功而還徙鎮武信東川董璋反攻遂州魯奇閉城拒

之旬月救兵不至城中食盡魯奇自刎死

按通鑑石敬瑭引兵至劍

州孟知祥舉魯奇首以示之魯奇二子從敬瑭在軍中泣請往取其首敬瑭曰知祥長者必葬而父豈不異於

身首異處乎既而知祥果收葬之

姚洪本梁小校自董璋為梁將洪嘗事璋後事唐別為

指揮使長興中戍閬州董璋反遣人以書招洪洪得璋

書輒投廁中後璋攻破閬州執洪數之曰爾為健兒我

遇汝厚奈何負我耶洪罵曰老賊爾昔為李七郎奴

史殿

董璋傳為汴富
人李瓌家僮

掃馬糞得一臠殘肉感恩不已今天子
用爾為節度使何苦反耶吾能為國家死不能從人奴
以生璋怒然鑊於前令壯士十人割其肉而食洪至死
大罵明宗聞之泣下錄其二子而厚卹其家

王思同幽州人父敬柔母劉仁恭女思同事仁恭為銀
胡鞬指揮使仁恭為子守光所囚思同奔晉為飛勝指
揮使累遷鄭州防禦使性勇敢好禮文士初未有戰功
以久次為匡國軍節度使徙鎮雄武是時吐蕃數為寇

而秦州無亭障思同列四十餘柵以禦之居五年來朝
明宗問以邊事思同指畫山川具陳利害於是始知其
材以為右武衛上將軍京兆尹西京留守石瓌瑋討董
璋思同為先鋒指揮使與璋戰不勝而却敬瑋兵罷思
同徙鎮山南西道已而復為京兆尹西京留守路王從
珂反以思同當東出之道尤欲與之相結遣指官郝詡
押牙未廷乂等相繼詣長安說以利害

敗史不詳從珂
遣郝詡等事下

文執郝詡語不
明今據通鑑增

又遣伶奴安十十以五絃謁思同欲因

其歡以通意是時諸鎮皆懷嚮背獨思同執十十及郝
詡等送京師愍帝嘉其忠即以思同為西面行營馬步
軍都部署三月會諸鎮兵圍鳳翔破東西關城興元張
虔釗攻城西督戰甚急士卒苦之反兵攻虔釗虔釗走
羽林指揮使楊思權引軍自西門入降從珂而思同未
知猶督戰嚴衛指揮使尹暉麾其衆曰城西軍入城受
賞矣何用戰邪士卒解甲棄仗聲聞數里遂皆入城降
諸鎮之兵皆潰思同挺身走至長安西京副留守劉遂

雍閉閉不納乃走潼關為從珂前鋒所執責曰罪可逃乎思同曰非不知從王而得生恐終死不能見先帝於地下從珂媿其言乃殺之

張敬達字志通代州人也小字生鐵

通鑑敬達性剛時人謂之張生鐵

少以騎射事唐莊宗為廳直軍使明宗時為河東馬步軍都指揮使領欽州刺史累遷彰國大同軍節度使徙鎮武信晉昌清泰二年契丹數入邊廢帝以河東節度使石敬瑭兼大同彰國振武威塞等軍蕃漢馬步軍

都總管屯于忻州繼疑敬瑭有異志乃以敬達為北面副總管以分其兵明年夏徙敬瑭鎮天平遂以敬達為大同彰國振武威塞等軍蕃漢馬步軍都部署敬瑭因此遂反即以敬達為太原四面招討使六月兵圍太原敬達設長城連柵雲梯飛礮以攻之輒為大風雨水所壞敬瑭求救於契丹九月契丹耶律德光自雁門入旌旗相屬五十餘里敬達陣於西山契丹誘以羸騎三千唐軍爭馳之追至汾曲伏發斷唐軍為二其在北者萬

餘人皆死敬達收軍柵晉安契丹圍之自晉安寨南長百餘里闊五十里內外隔絕聲問不通敬達猶有兵五萬人馬萬匹久之食盡削木篩糞以飼其馬馬死者食之已而馬盡副招討使楊光遠勸敬達降晉敬達自以不忍背唐而救兵且至光遠促之不已敬達曰諸公何相迫邪胡不殺我而降光遠即斬敬達降契丹耶律德光聞敬達死哀其忠遣人收葬之

翟進宗與張萬迪同事晉進宗為淄州刺史萬迪為登

州刺史楊光遠反以騎兵脅取二刺史至青州萬迪聽命而進宗獨不屈光遠遂殺進宗出帝贈進宗左武衛上將軍及光遠平曲赦青州而獨不赦萬迪暴其罪而斬之詔求進宗尸加禮歸葬以其子仁欽為東頭供奉官

沈斌字安時徐州下邳人少為軍卒事梁為拱宸都指揮使後事唐從魏王繼岌破蜀平康延孝以功為虢州刺史歷隨趙等八州刺史晉開運元年為祁州刺史契

丹入塞至于榆林過祁州斌以契丹深入晉地而歸羸
乏可擊即以州兵邀之殺獲頗衆契丹以精騎剋門斌
兵多死城中無備趙延壽留兵急攻之遣人招斌降斌
從城上罵延壽曰公父子自誤陷於北庭復忍以敵衆
殘害父母之邦斌能為國死爾不效公所為也已而城
陷斌自盡其家屬皆沒於契丹

王清字去瑕洺州曲周人初事唐為寧衛指揮使後事
晉為奉國都虞侯安從進叛襄州從高行周攻之逾年

不能下清請先登遂攻破之開運二年從杜重威戰陽
城清以力戰功為步軍之最加檢校司徒是冬重威軍
中渡橋南契丹軍其北以相拒而以精騎並西山出晉
軍後南擊欒城斷晉餉道清謂重威曰今去鎮州五里
而守死於此營孤食盡將若之何請以步卒二千為先
鋒奪橋開路公率諸軍繼進以入鎮州可以守也重威
許之遣與宋彥筠俱前清與契丹戰敗之奪其橋是時
重威已有二志猶豫不肯進彥筠亦退走清曰吾獨死

于此矣因力戰而死

按通鑑清謂其衆曰吾輩當以死報國耳衆感其言莫有退志清及

士卒
盡死

史彥超雲州人勇悍驍捷周太祖起魏時彥超為漢龍

捷都指揮使

按五代會要廣順元年改侍衛馬步軍額馬軍舊稱護聖改為龍捷步軍舊稱護國

改為
虎捷

以兵從太祖入立遷虎捷都指揮使戍晉州劉旻

來攻州無主帥知州王萬敢不能拒彥超以戍兵堅守

月餘太祖遣王峻救之旻兵解去以功遷龍捷右廂都

指揮使領鄭州防禦使周與北漢戰高平彥超為前鋒

先登陷陣以功拜感德軍節度使

通鑑以為鎮國節度使

周兵圍

太原契丹救之兵出忻代世宗遣符彥卿拒之以彥超為先鋒戰忻口彥超勇憤俱發左右馳擊解而復合者數四遂歿于陣世宗以師久無功欲去未決聞彥超戰死遽班師憂忿不食者數日贈太師優恤其家

韓通并州太原人在晉以勇力應募補騎軍隊長開運末漢祖建義於太原召寘帳下從至東京累遷衙隊副指揮使及開國加檢校左僕射乾祐初周祖為樞密使

統兵伐河中知通謹厚以之自隨奏為天雄軍馬步軍都校委以心腹及入汴通預有力焉周祖親征兗州以通為在京右廂都巡檢時河溢灌河陰城命通率廣銳卒渡汴口又部築河陰城勅營壁未幾拜保義軍節度觀察留後以郊恩正授節度并州劉崇南侵命通副河中王彥超出晉州道擊之捷於高平以通為太原北面行營部署為地道攻其城會班師移鎮曹州加檢校太保世宗顯德二年以深冀之間有胡蘆河東西橫亘數

百里非峻其堤塹不能扼契丹奔突命通與王彥超浚治之功未就契丹兵至通迎擊退之遂城李晏口為靜安軍四旬而完又城束鹿及鼓城并葺祁州博野安平往來深定間夜宿古寺晝披荆棘在安平領百餘騎督役契丹奄至通率麾下與戰會日暮大風雨契丹解去又城百八橋鎮及武強縣皆旬日畢功時攻秦鳳以通為西南面行營馬步軍都虞侯入大散關分兵城固鎮以斷蜀餉道及拔鳳州以功授侍衛馬步軍都虞侯世

宗征淮南幸壽春皆為京城內外都巡檢淮南平為歸
德軍節度奉詔河北按行河堤發徐宿宋單等州民浚
汴渠數百里世宗將北伐命通與高懷德張鐸先赴滄
州即領兵入契丹境乾寧軍之南俄為陸路都部署巡
北邊自浮陽至淤口遂通瀛莫初克益津關建霸州役
濱隸民數千城之命通董其役師還以為檢校太尉同
平章事充侍衛親軍馬步軍副都指揮使恭帝即位宋
祖奉詔北征至陳橋為諸軍推戴通在殿閣聞變惶遽

而歸將率衆備禦軍校王彥昇遇之於路策馬逐之通
馳入其第未及闔門為彥昇所害妻子皆死宋祖聞其
死怒彥昇專殺以開國之初隱忍不及罪即下詔褒通
臨難全節以禮收葬通性剛直言多忤物人謂之韓瞎
眼其子頗有智畧史忘其名見宋祖有人望常勸通早
為之所通不聽故及於難

李筠并州太原人善騎射後唐清泰初應募為內殿直
遷控鶴指揮使晉開運末契丹入汴京其將趙延壽聞

筠驍勇召寘帳下及契丹主北歸延壽至常山為永康王所繫契丹衆數萬據常山留耶律嘉哩衆纔二千騎在汴與漢相雜嘉哩貪恣自奉削漢軍日食衆皆菜色筠乘其怨密與王羗石公霸何福進等謀以閏七月二十九日據兵庫焚牙門併力擊之契丹衆大驚由北門出明日集衆入郭力戰奔敗遂挈族而去是戰筠功居多即送款漢祖授筠博州刺史筠以賞薄不悅周祖鎮大名表為先鋒指揮使北面緣邊巡檢及起兵入汴筠

同郭崇從與慕容彥超戰于留子陂彥超敗走廣順初
權知滑州拜義成節度改彰德軍會并人侵晉州王峻
率師往拒筠亦請西征詔褒之周祖征兗還次濮州筠
來朝從至澶州宴訖遣還尋改昭義軍節度加檢校太
傅時王峻兼節制以筠及王殷何福進皆創業功臣故
並加恩焉顯德親郊加同平章事世宗即位并人入侵
其將張暉率先鋒自團栢谷入筠遣護軍穆令均以步
騎二千拒之失於偵邏遇伏敗還世宗親征沁州命筠

率行營兵赴太原與符彥卿拒契丹援兵以偏師遼契丹後奮擊走之師還加兼侍中二年筠破并軍於榆社獲其將安濟康超等七十餘人三年筠遣行軍司馬范守圖率兵入遼州界殺獲以獻四年又遣守圖入河東界降二砦五年筠自將入石會關破并州人六砦是冬又破遼州長清砦擒其磁州刺史李戴興以獻六年平遼州獲刺史張丕旦等以獻筠在鎮擅用征賦頗集亡命嘗以私忿囚監軍使世宗心不能堪但詔責而已宋

祖建隆初加兼中書令遣使諭以受周禪筠即欲拒命
左右強之方下拜貌猶不恭及延使者升階置酒張樂
遽索周祖畫像懸壁涕泣不已賓佐惶駭告使臣曰令
公被酒失其常性幸勿為訝及太原劉筠以蠟書結筠
共舉兵是時筠子守節為皇城使宋祖遣歸諭旨曰我
未為天子時任自為之今既定位獨不能臣我耶守節
還白筠謀愈亟遂起兵令幕府為檄書辭多不遜從事
閻丘仲卿獻策曰公以孤軍舉事其勢甚危雖倚河東

之援亦恐不得其力大梁兵甲精銳難與爭鋒不如西
下太行直抵懷孟塞虎牢據洛邑東向而爭天下計之
上也筠曰吾周朝宿將與世宗義同兄弟禁衛皆舊人
聞吾來必倒戈而歸遂執監軍周光遜李廷玉遣判官

孫孚衙校劉繼宗

五代史東漢世家作劉繼冲

送款劉筠以求濟師

及筠率兵與契丹數千衆來援至太平驛筠見鈞兵寡
弱甚悔之鈞召與語筠自言受周祖大恩敢愛其死不
寤鈞與周祖有世讎鈞默然遂疑之命其宣徽使盧贊

監筠軍筠心不能平筠有馬三千匹關鞠場閱習日夜
謀畫留其子守節守上黨引衆南向宋祖遣石守信高
懷德將兵討之救勿縱筠下太行急進師扼其隘以破
之又遣慕容延釗王全斌由東路會守信與監軍李崇
矩破筠衆於長平又攻大會砦下之宋祖遂親征山路
險峻多石不可行宋祖先於馬上負數石羣臣六軍皆
負之即日平為大道與守信懷德會破筠衆數萬於澤
南殺監軍使盧贊擒筠節度范守圖筠走保澤宋兵列

柵圍之筠龍捷使王廷魯汾州團練使王全德率所部自昭義來降筠益失援宋祖親督戰拔其城筠赴火死宋祖進伐上黨守節以城降釋其罪以為單州團練使筠性雖暴戾事母甚孝每怒將殺人母於屏風後呼之筠趨至遽命釋之筠有愛妾劉氏隨筠至澤時被攻城危劉謂筠曰城中健馬幾何孤城危蹙破在俄頃今誠得馬數百與腹心潰圍出保昭義求援河東猶愈於坐待死也筠然之召左右計馬將以是夕出或謂筠曰今

帳前計議皆云一心縣門既發不可保矣儻劫公而降
悔其何及筠猶豫不決明日城陷筠將赴火劉欲俱死
筠以其有娠麾令去守節既購得之果生子焉後守節
無子以劉氏所生之弟為嗣

李重進其先滄州人周太祖之甥福慶長公主之子也
晉天福中仕為殿直漢初從周祖征河中廣順初遷內
殿直都知領泗州刺史累遷殿前都指揮使加領泗州
防禦使顯德初領武信軍節度重進年長於世宗及周

祖寢疾召重進受顧命令拜世宗以定君臣之分世宗嗣位為侍衛親軍馬步軍都虞侯從征劉崇戰於高平不利大將樊愛能何徽以其衆遁唯重進與白重贊勦兵不動既而宋祖先以麾下犯敵重贊繼領所部力戰世宗躬率衛兵合勢周師復振崇遂大敗師還加同中書門下平章事改歸德軍節度兼侍衛馬步軍都指揮使世宗親征淮南命重進將兵先赴正陽俄聞李穀攻壽春不克促重進兵助之吳人發兵三萬又發戰擢二

百艘以張斷橋之勢兵勢甚盛時周師未朝食吳師奄至重進與韓令坤合勢擊之一鼓而敗斬首萬餘級追奔二十餘里殺大將劉彥貞擒獲無算詔書褒諭即以重進代穀為行營招討使改廬壽等州招討使會張永德屯下蔡與重進不協密遣親信乘驛上言世宗不之信亦不介意二將俱握重兵人情益憂恐重進遂自壽陽單騎直詣永德帳中命酒親酌謂永德曰吾與公皆國家肺腑相與戮力同獎王室公何疑我之深也永德

意解三軍皆安李景知之密令人齎蠟書誘重進啗以厚利重進表其事時圍壽經年未下吳遣將許文績邊

鎬

按五代史載吳遣將三人宋史於此傳內止舉二人其一遺者為朱元後降于宋

帥舟師數

萬沂淮來援文績維舟淮南據紫金山山距壽數里設十餘砦連亘相望與城中烽火相應又南築夾道將抵壽為饋路重進伺便出兵擊之奪其二砦獲器甲甚衆及克壽錄功加檢校太傅兼侍中又改天平軍節度仍為招討使攻濠州降其團練使郭廷謂從平楚州會李

景請畫江為界詔班師留重進戍守俄乃還鎮世宗北
伐命將兵先趣北面及駐蹕瓦橋關重進與諸將率師
而至時關南已平議進取幽州會世宗不豫而止恭帝
嗣位加檢校太尉改淮南道節度宋祖受禪加重進中
書令既而移鎮青州重進與宋祖俱事周室分掌兵柄
常心憚之至是愈不自安及聞移鎮陰懷異志宋祖知
之遣六宅使陳思誨齎賜鐵券以安其心重進自以周
室近親恐不得全遂拘思誨治城隍繕甲兵遣人求援

李景監軍安友規常為重進所忌遂與親信數人踰城告變宋祖遣石守信王審琦李處耘宋偓四將率兵討之宋祖謂左右曰朕於周室舊臣無所猜間重進不體朕心自懷反側令六師在野當暫往撫之遂親征次大儀鎮石守信等遣使馳奏揚州破在旦夕願車駕臨視宋祖徑至城下即日拔之重進赴火死思誨亦為其黨所害初重進謀舉兵遣親吏翟守珣往潞陰結李筠守珣素識宋祖過京師潛因樞密承旨李處耘求見奏重

進終無歸順之意宋祖即令說重進緩其謀無令二兇
並作以分兵勢守珣歸乃勸重進養威持重未可輕發
重進甚信之及李筠誅重進始舉兵得如宋祖之策皆
守珣所致云又有張崇詒者周廣順初為樞密承旨二
年出為解州刺史顯德三年改德州又改泗州澤州重
進赴淮南時道出泗上崇詒說以畜兵完城之計重進
敗事露詔捕之棄市籍其家

欽定續通志卷五百十

欽定四庫全書

欽定續通志卷五百十一

忠義傳

宋

臣等謹案宋史忠義傳舊為十卷內如死於金與死於元者前後錯出又雜入上書言事諸臣部居

未能釐然茲分凡死事

如死於遼及僂
智高方臘之類

死義

如陳
東歐

陽徽
之類

者為一卷死於金與元者各為二卷並案時

地先後以類相附又有原載入忠義而其人未經
死事其事蹟亦不能如唐夏侯端諸人之義烈及
事蹟前後複見名字彼此互異實是一人者今並
加刪併仍逐條加案附訂以符史裁通例焉

楊重進

秦傳序

康保裔

董元亨

馬遂

曹觀

趙師旦
王從政

馬貴

高敏

張吉

景思忠

思立

蘇絨

子明
廣淵

子正
直温

王竒

高永年

鞠嗣復

宋旅

丁仲修
輔襄

陳華
項德
張理

詹良臣

江仲明
蔣煜

楊震

居中
執中

朱昭

曾孝序

許張侃

陸有
丁興宗

薛良顯

唐敏求

郭俱

孟彥卿

趙民彥
謝淳

胡唐老

鄭凝之

劉晏

王儔

李唐
蔣夔

潘偶
朱嗣孟

陳永道

連萬夫

孫知微

趙士蔭

士真
士道

趙師櫓

馬俊

謝臬

范旺

易青

鄭振

王師道

王輝

楊震仲

郭靖

陳霖

胡斌

高談

孫益

顧緒
顧絢

王大壽

孫畱

王孝忠

陳東

歐陽澈

馬伸

呂祖儉

祖泰

楊宏中

林仲麟
蔣傳

徐範
周端朝

張衡

華岳

鄧若水

楊重進太原人少有膂力周祖鎮大名隸帳下廣順初

補衛士宋初累遷至內殿直都虞候太平興國初改龍

衛軍都校領徐州刺史從征太原出為萊州刺史隨曹

彬出師為右廂排陣使改武州防禦使高陽關都部署

會契丹兵至力戰遂沒於陣

按重進傳宋史舊附於外戚賀今圖傳後今因其力

戰死事移置於此

秦傳序江寧人淳化五年充夔峽巡檢使李順之亂賊

衆薄城下傳序督士卒晝夜拒戰危感日甚長吏皆奔

竄傳序謂士卒曰吾為監軍盡死節以守城吾之職也

安可苟免乎城中乏食傳序出囊橐服玩盡市酒肉以犒士卒慰勉之衆皆感泣力戰城壞傳序赴火死其家寄荆湖間長子爽遡峽求父屍溺死奏至錄次子煦為殿直以錢十萬賜其家

康保裔河南洛陽人祖志忠後唐長興中討王都戰沒父再遇為龍捷指揮使從太祖征孝筠死於兵保裔在周屢立戰功及再遇陣歿詔以保裔代父職從石守信破澤州明年攻河東之廣陽獲千餘人又從諸將破契

丹於石嶺關累遷高陽關副都部署真宗即位領彰國
軍節度出為并代都部署徙知天雄軍復為高陽關都
部署契丹兵大入保裔選精銳赴之契丹圍之數重決
戰二日兵盡矢絕援不至遂沒焉時車駕駐大名聞之
震悼贈侍中官其子繼英等四人孫一人繼英手奉告
命悲泣伏地不能起帝惻然顧謂左右曰保裔父祖死
疆場身復戰沒世有忠節贈賞之典所宜加厚繼英仕
至左衛大將軍貴州團練使嚴於馭軍厚於撫宗族其

卒也家無餘財

董元亨深州東鹿人累官至國子博士通判貝州王則據城叛是日冬至元亨方朝謁天慶觀促馬馳還坐廳事賊黨露刃入脅元亨索軍資庫鑰元亨據案叱曰妖賊乃敢弄兵乎我有死耳鑰不可得也賊將郝用繼來索愈急元亨厲聲痛罵用遂殺之攜鑰而去事聞贈太常少卿錄其子孫三人賊平獲郝用斬以祭元亨

馬遂開封人初隸龍衛軍補散直改三班奉職為北京

指使王則叛留守賈昌朝使遂持榜入貝州招降諭以
禍福不答遂將殺則而無兵仗自隨因奮起投杯抵則
扼其喉歐之流血而左右卒無助之者賊黨攢刃斷其
一臂猶詈則曰妖賊恨不斬汝萬段賊縛遂廳事前支
解之事聞贈官范使官其子五人後得殺遂者使其子
剖心而祭之

曹覲字仲賓曹修禮子也叔修古卒無子天章閣待制
杜杞為言於朝授覲建州司戶參軍為修古後皇祐中

以太子中舍知封州儂智高叛行至州州人不任戰鬪
又無城隍以守覲麾都監陳煜引兵迎擊自率從卒決
戰不勝被執賊捽使拜且誘之曰從我得美官付汝兵
柄以女妻汝覲不肖拜詈曰人臣惟北面拜天子我豈
爾從苟生邪速殺我幸矣賊徙置舟中覲不食者兩日
探懷中印章授從卒曰我且死若求間道以此上官賊
知終無降意乃殺之至死詬聲不絕投屍江中事聞贈
太常少卿錄其子四人贈修古尚書工部侍郎當智高

之反乘嶺南無備縣吏望風竄匿獨覲與孔宗旦趙師

旦能以死守

按孔宗旦以守邕州被害原附本傳之後今歸孔氏後裔傳此從刪

趙師旦

字潛叔樞密副使稹之從子用稹廕試將作監主簿累遷太子右贊善大夫知康州賊衆薄城下師旦只有兵三百開門迎戰殺數十人會暮賊稍却師旦語其妻取州印佩之使負其子以匿遂與監押馬貴部士卒固守州城遲明賊攻愈急矢盡與貴俱還據堂而坐智高麾兵鼓譟爭入脅師旦師旦大罵曰飢獠朝廷負若何事

乃敢反邪天子發一校兵汝無遺類矣智高怒并貴害
之事平贈光祿少卿錄其子弟并從子三人同時有王
從政者以東頭供奉官閤門祇候與儂智高戰於太平
場被執罵賊不已至以沸湯沃之終不屈而死贈信州
刺史錄其孫二人

高敏登州人為涇原指使數與西夏戰遭重傷范仲淹
韓琦皆薦之為閤門祇候歷利州路邠寧環慶都監主
蕃部事羌人圍大順城聲言將出廊延敏屢白主帥李

復圭曰兵家之事聲東擊西環慶嘗破白豹金湯結囊
已深不可不備已而果以兵三十萬來寇總管楊遂駐
兵大義以敏為先鋒將夏人攻奪大順水砦敏出通路
自寅及午且戰且前多所斬獲次榆木援兵不至中流
矢死詔贈嘉州刺史錄其三子為侍禁殿直有慶州卒
張吉者為淮安鎮守烽兵夏人寇東谷掠得之脅以兵
使呼城中曰淮安諸砦已破宜速降吉反其辭曰努力
諸砦無虞賊糧盡且去矣賊怒殺之詔贈內殿崇班又

錄其子

景思忠字進之普州安岳人以父泰廢累官西京左藏庫使為遂州駐泊都監夷人寇清井鈴轄張承祐出兵救之思忠部卒五百為前鋒戰不利死者十之六左右勸思忠引避不聽奮劍疾戰而死神宗憫之官思忠及同死者之子七人弟思立以廢主渭州治平砦羅阿用兵韓絳使攝保安軍夏人寇順寧思立領兵赴援諸將敗一軍獨全以功知德順軍策應王韶取熙州遂定河

州嘗與敵力戰斬不用命者數人軍聲大振詔言其忠
勇累擢東上閤門使河州刺史又遷四方館使河州團
練使知其州青伊特結果莊舉兵襲殺伐木卒害小校
七人以書抵思立詞不遜思立不能忍帥兵六千攻之
於踏白城鈴轄韓存寶蕃將恰岳交止之不聽自將中
軍使存寶及魏竒為先鋒王存將左賈翊將右果莊衆
二萬分三砦以抗官軍戰久之羌從山下圍中軍他將
王寧李元凱歿於陣思立存寶潰圍出議曰日暮兵疲

宜移屯東岡以自固思立以魏竒創重獨徙其軍方遣之而殿後兵亂前者望見亦皆潰思立鬪且退曰我適以百騎走羌數千人無助我者今敗矣當自剄以謝朝廷衆止之再戰遂死時已除忠州防禦使會其死不及拜帝以其輕敵致敗不復贈官

蘇緘字宣甫泉州晉江人舉進士累官秘書丞知英州儂智高圍廣緘募士數千人夜行赴難廣人黃師宓陷賊中為之謀主緘擒斬其父羣不逞並緣為盜復捕殺

六十餘人招其誑誤者六千八百人使復業賊勢沮將
解去緘分兵先扼其歸路布槎木亘四十里賊至不得
前乃遠出數舍渡江由連賀而西緘與賊戰推傷甚衆
盡得其所掠物仁宗喜換為供備庫副使廣東諸監官
押兩路兵甲襲賊至邕大將陳曙以失律誅緘亦貶房
州司馬十餘年始還副使知廉州坐事謫潭州都監熙
寧初進如京使廣東鈐轄四年交趾謀入寇以緘為皇
城使知邕州八年蠻兵入寇破邕四砦緘閱州兵得二

千八百使分地自守民震驚四出緘悉出官帑及私藏示之曰吾兵械既具蓄聚不乏今賊已薄城宜固守以遲外援敢越佚則孥戮汝有大校翟績潛出斬以徇由是上下脅息緘子子元為桂州司戶因公事攜妻子來省欲還而寇至緘念人不可戶曉必以為郡守家出城乃獨遣子元留其妻子選勇士挈舟力戰斬其二酋邕既受圍緘晝夜行勞士卒發神臂弓射賊所殪甚衆蠻百計攻城為雲梯又為攻濠洞蒙以華布緘悉焚之計

窮將引去或教賊囊土傅城頃刻高數丈蟻附而登城
遂陷緘猶領傷卒馳戰愈厲而力不敵乃曰吾義不死
賊手亟還州治殺其家三十六人藏於坎縱火自焚蠻
至屠郡民五萬餘人邕被圍四十二日糧盡泉涸人吸
漚麻水以濟渴多病下痢相枕籍以死然訖無一叛者
神宗聞緘死嗟悼贈奉國軍節度使謚曰忠勇以子元
為西頭供奉官閣門祇候召對謂曰邕管賴卿父守禦
儻如欽廉即破則賊乘勝奔突桂象皆不得保矣昔張

巡許遠以睢陽蔽遮江淮較之卿父不能過也改授殿中丞通判邕州餘子子明子正孫廣淵直溫與絨同死皆褒贈焉

王竒汾州人武舉中第章惇經營湖北溪洞以為將領降其酋舒光貴縛元猛平懿洽等州累遷如京副使為湖南都監徙廣西宜州蠻寇邊竒領兵至天河縣數日蠻萬人驟集竒兵遂敗麾下數百人勸竒策馬逃去竒罵曰大丈夫當盡節以報國何走為戰而死詔贈皇城

使忠州防禦使官其家六人

高永年河東蕃官也為麟州都巡檢王瞻取青唐永年
總蕃兵為先鋒屢有戰功羌酋隆贊自乾溝逼鄯州永
年佐瞻拒守及姚雄棄湟鄯皆以永年殿歸師崇寧初
知岷州蔡京議復兩州王厚使永年帥兵二萬克安川
堡遂至湟即知州事自皇城副使進四方館使利州刺
史為熙秦兩路兵都統制平鄯州遷賀州團練使知其
州竒徹羅薩合夏國四監軍之衆逼宣威城永年出禦

之為多羅巴所殺

鞠嗣復不知何許人宣和初知歙州休寧縣方臘黨破縣欲逼使降面斬二士以怖之嗣復怒罵不少懾屢言何不速殺我賊曰明府宰邑有善政乃委之而去朝廷知之擢知睦州嘗為賊所傷自力渡江乞師於宣撫使未及行而卒

按鞠嗣復為賊所傷猶欲自力濟師未行而卒可謂忠於王事始終不渝茲仍史例

存之
謹識

宋旅字庭實莆田人第進士累官奉義郎知剡縣方臘

既陷歛睦杭衢婺五州且犯越旅遣妻子浮海歸閩獨
與民據守俄而盜衆大至躬冒矢石力不敵而死詔贈
朝散郎錄其四子丁仲修字敏之温州人方臘黨俞道
安陷樂清將渡江巡檢陳華往捕死之先鋒將張理同
李振出南門迎敵渡八接橋橋斷馬蹶溺死賊至帆游
夏祥遣輔褒迎戰褒死之仲修率鄉兵禦諸樂灣力屈
乃死項德婺州武義人郡之禁卒也宣和間盜發幫源
明年陷婺而武義隨沒德率敗亡百人破賊困據邑之

城隍祠自二月至五月大小百餘戰俘讖不可勝計方謀復永康諸縣賊盡銳邀之黃姑嶺下德戰死

詹良臣字元公睦州分水人以恩得官調縉雲縣尉方臘起有他盜霍成富用臘年號剽掠縉雲良臣率弓兵數十人出禦之為所執成富誘使降良臣曰汝輩不知求生顧欲降我耶旦暮官軍至汝肉餉狗鼠矣賊怒鬱其肉使自啖之良臣吐且罵至死不絕聲事聞贈通直郎錄其子孫二人時有江仲明者台州人鄉里遭亂載

老母逃山澗中猝遇賊逼使就降仲明義不辱奮起大罵卒死之又有蔣煜者州之仙居人有文學賊欲妻以女煜拒之脅之拜亦不從賊曰吾戮汝矣煜伸頸就及詈聲不絕而死

楊震字子發代州崞人以弓馬絕倫為安邊巡檢有戰功從折可存征方臘自浙東追襲至黃巖賊帥呂師囊扼斷頭之險不得進可存問計震請以輕兵緣山背上憑高鼓譟發矢石賊驚走已復縱火自衛震身被重鎧

與麾下履火突入生得師囊及殺首領三十人進秋五等還知麟州建寧砦初契丹將小奇嚙攻麟府諸城郭震父宗閔領本道兵馬屢摧敗之靖康元年十月太原陷奇嚙驅叛卒與夏人奚人圍建寧扣壁語震曰汝父奪我居破我兵掩我骨肉我忍死到今若急舉城降當全汝軀命時城中守兵不滿百震與戰士約斬一級賞若干官帑竭繼以家人服珥吏士感激自奮越旬矢盡力乏城不守與子居中執中力戰俱沒惟長子存中從

征河北獨免明年宗閔亦死事於長安建炎二年詔贈
震武經郎存中貴請於朝謚曰恭敬

朱昭字彥明府谷人以效用進累官震武城兵馬監押
攝知城事金兵內侵夏人乘虛盡取河外諸城遂攻震
武昭募驍銳兵卒千餘人夜緹兵出薄其營營中驚亂
城上鼓譟乘之殺獲甚衆夏人晝夜進攻不止是時諸
城降者多昭故人語昭曰天下事已矣忠安所施昭叱
曰汝輩背義偷安不異犬彘尚敢以言誘我乎我惟有

死耳凡被圍四日不可復支昭召諸校謂曰城且破妻
子不可為賊污幸先牋我家而背城死戰衆未應昭幼
子戲階下遮起手及之長子驚視又殺之徑領數卒屠
其家人昇屍納井中將士將妻孥者皆盡殺之昭謂衆
曰我與汝曹俱無累矣部落子有陰與賊通者告之曰
朱昭與其徒各殺其家人將出戰人雖少皆死士也賊
大懼以利啗守兵得登城昭勒衆於通衢接戰自暮達
旦屍填街不可行昭馬蹶墜墜賊驩曰得朱將軍矣欲

生致之昭瞑目仗劍無敢前者旋中矢而死

曾孝序字逢原泉州晉江人以廕補將作監主簿監秦州海安鹽倉因家秦州累官至環慶路經畧安撫使時蔡京方行結糴俵糴之法盡括民財孝序上疏言其非是京怒遣御史宋聖寵劾其私事鍛鍊無所得削籍竄嶺表遇赦量移永州京罷相授顯謨閣待制知潭州復以論徭事與吳居厚不合落職知袁州尋復職再知潭州道州徭人叛討平之進顯謨閣直學士改龍圖閣直

知青州高宗即位遷薇猷閣學士升延康殿學士召赴
行在既而青州民詣南郡借留許之先是臨朐土兵趙
晟聚衆為亂將官王定失利而歸孝序責以力戰自贖
定乃以言撼敗卒奪門斬闕入孝序出據廳事瞋目罵
之遂與其子宣教郎訐皆遇害城無主遂陷知臨淄縣
陸有常率民兵拒守死于陣知益都縣張侃于棗縣丞
丁興宗亦死之後贈孝序五官為光祿大夫謚威愍子
訐承議郎有常朝散郎錄其家一人侃興宗各贈二官

官二子

薛良顯字貴勤溫之瑞安人登崇寧二年進士第累官為大宗正丞出為江東轉運使江寧軍校周德作亂良顯聞變率眾與戰死之

唐敏求字好古太平當塗人宣和六年進士調德化主簿盜起敏求挺身率眾捍賊遇害事聞加贈朝官補其子楠將仕郎

郭僕字同升開封祥符人權咸平縣丞靖康初勤王兵

有剽掠邑界者僕率民兵擊之得犯者斬以徇尋知宣城縣苗傅劉正彥之變說郡守劉珏募勇士倍道赴難人皆避之通判金州權饒州浮梁寧未行時有賊張頂花者已逼縣境衆止之僕曰安逸則就艱危則辭非我所學徑就道至縣約束吏士誓以死戰賊聞之僞降入邑為變邑官竄伏僕曰吾為寧義不可去端坐公署大罵不絕口遂遇害詔贈承議郎錄其後二人

按宋史原以郭贊王

進吳從龍三人附傳致贊等俱死于金今折入別卷

孟彥卿忠厚從父也通判潭州建炎三年潭城中叛卒
焚掠彥卿招安其衆未幾潰兵杜彥白袁州入瀏陽遂
犯善化長沙二縣彥卿率民兵拒之賊退還瀏陽彥卿
追與之戰俄而民兵有自潰者賊遂乘之殺彥卿持其
首以告所掠民兵曰此善戰孟通判首也因支解以徇
添差通判趙民彥率民兵赴之鏖戰瀏陽城南殺傷甚
衆為問者折其陣中認旗衆驚潰民彥為賊所得邑士
謝淳以才勇衆推為前鋒助民彥戰淳手殺數十人力

屈亦被執賊并殺之事聞彥卿民彥並贈直龍圖閣官
其家各三人淳字景祥贈成中郎官具子晞古

胡唐老字俊明樞密副使宿之曾孫也崇寧間登進士
第歷南京國子博士知江陵縣召為秘書省校書郎靖
康元年擢殿中侍御史金人再攻京師以唐老請拜康
王河北兵馬大元帥京城破搜括金銀分命朝臣董之
以臺臣糾察唐老預焉尋出知無為軍建炎三年還知
衢州苗傅敗走引亂兵犯城唐老拒之以功擢秘閣修

撰未幾進徽猷閣待制充兩浙宣撫司參謀官知鎮江
府兼浙西安撫使杜克降於金建康失守潰卒戚方等
趣鎮江城壁頽圯兵不滿千唐老度力不敵因撫之無
何方欲犯臨安妄言赴行在請唐老部衆以行不從方
衆環脅之唐老怒罵不已遂遇害贈為徽猷閣直學士
謚定愍時安撫司機宜鄭凝之亦以兵死詔官其家一
人凝之戩孫也

劉宴字平甫嚴州人入遼舉進士為尚書郎宣和四年

帥衆來歸授通直郎金人逼京師以晏總遼東兵號赤
心隊建炎初從劉正彥擊降淮西賊丁進遷朝散郎正
彥反晏歸韓世忠世忠追正彥及苗傅于浦城晏以所
部力戰正彥既擒世忠上其功遷一官羣寇犯常州郡
守請晏為援晏以精銳七千人出奇破之進直龍圖閣
保馬跡山以捍寇寇舟至晏遣舟師迎戰降其衆會戚
方圓宣城急命晏往援晏至城下未立營壘出不意直
擣方帳下方大驚卻走晏欲生致方單騎追之方率其

衆還戰晏不能敵猶手殺數十人為賊所害事聞贈龍圖閣待制官其子四人

王儁以通判真州權廣德軍建炎末盜戚方引兵過廣德儁與權判官李唐俊權法司潘偁權知廣德縣章績權丞蔣夔皆死後贈儁二官唐俊等皆京秩錄其家各一人朱嗣孟饒州樂平人宣和間進士為廣德司戶兼司理當戚方犯廣德守遣嗣孟招安之嗣孟直詣賊壘為陳順逆禍福方以迂已殺之事聞贈宣教郎官其子

陳求道字得之咸寧人登進士第靖康間判都水監朝
議二帝出郊請和求道力爭不聽金人立張邦昌下令
在京官不朝者死求道稱疾不往嘔血累日以二帝蒙
塵屢欲自殺因救得免宗澤尹開封使求道治陳留決
河七日盡復故道建炎四年命為襄鄧隨郢鎮撫以奏
兵食不給待命未行自咸寧挈家就食嘉魚值亂兵起
招撫劉忠叛一夕數千人驅求道與其家至茗山逆旅
具酒食欲奉為主將南走湖湘求道正色峻辭賊怒殺

其妻蔡及二子符佺必欲從已求道罵愈厲賊斫其口
拔舌斷之遂死獨符子凱竄山谷得免

連萬夫德安人或曰南夫弟也補將仕郎建炎四年羣
賊犯應山萬夫率邑人保山砦賊不能犯寇浪子者以
兵至圍之三日卒破之賊知萬夫勇敢有謀欲留為用
萬夫怒厲聲罵賊為所害贈右承務郎官其家一人

孫知微者以朝請大夫通判舒州紹興元年賊劉忠入
其境執知微不屈忠怒斃而食之

按知微傳原附於鄭
振之後以守土之臣

不應列於保捍鄉里者後雖同屬死事而異時異地牽合不倫今為析出另編于此

趙士蔭字景瞻太宗之後生五歲補右班殿直既長不事科舉去為郡縣吏累遷至淮南西路兵馬鈐轄駐壽春劇賊丁一箭衆號十萬來攻城郡守悉以備禦委士蔭賊三旬不退士蔭募敢死士與之謀有張宣者應募獨持樂緇城下擊殺數十人賊衆披靡乃選壯士數百人夜開城門出其不意擊走之以功遷三官秩滿授江東路鈐轄李成叛據江淮遣其黨馬進圍九江士蔭竭

力捍守紹興元年正月詔張俊為江淮招討使責以討賊未至而城已陷時城中罷卒僅數千楮柱百餘日食盡城破衆號呼曰無殺我趙鈐轄成素服士蔭之義欲以為偽安撫使士蔭怒罵曰賊欲屈我邪陰裂帛書示諸子曰賊不殺我我義不苟活汝輩得出當為我雪恥遂仰藥而卒賊怒并害其家數十口事聞帝嘉悼贈武功大夫士蔭六子不恇不忒不愆不愆不愆不愆不愆不愆不愆也

也 不恇不愆不隱死焉

按原傳此下附有趙士蔭士跋叔皎叔憑訓之壘之聿之陳自

仁劉玠各傳訓之自仁死於永豐叛軍士醫等皆
死于金與士蔭等死于寇者不同今並析出另傳 時宗

子有士真士道者皆以死事聞士真權知陽信軍寇劉
滿至士真拒之兵潰遇害後贈右朝奉大夫官其一子
士道以武翼大夫守江州紹興五年馬進寇州士道遇
害贈武德大夫官其家二人

趙師檣以罪拘管西外宗正司會寇逼尤溪福建提刑
王夢龍令師檣統卒數百往戍寇至迎敵於林嶺身為
先鋒戰十餘合賊至益衆師檣所乘馬適陷賊斷其左

臂師櫓以右手拔背刀斬七級力盡而死贈武節郎與
一子恩澤

馬俊或曰進太平州慈湖若兵也紹興二年若軍周青
等據州叛俊陰結其徒十人殺賊至南門伺青出上馬
斫中頰九人懼不敢前俊與妻子皆遇害三年贈修武
郎

謝臬開封人為鎮撫使統制官李成陷虢州欲降之臬
指腹示賊曰此吾赤心也自剖其心以死

范旺南劍州順昌縣巡檢司軍校也順昌盜俞勝等作亂官吏皆散土軍陳望與射士張袞謀舉若應之旺叱之曰吾等父母妻子皆受國家廩食以活今反助賊為虐是無天地也凶黨忿剔其目而殺之一子曰佛勝年二十以勇聞賊詐以父命名之至則俱死妻馬氏賊脅汚之不從節解之紹興六年詔贈承信郎

易青為都督行府摧鋒軍効用廣東賊曾袞叛紹興六年經累使連南夫與摧鋒軍統制韓京督兵討之募敢

死士夜劫袞營青在行中為所執賊驅至後軍趙績若
外謂績曰汝大軍為我擒者甚眾青大呼曰勿信所擒
者我爾賊又言吾不汝殺第令經畧持黃榜求招安青
又呼曰勿聽任賊殺我我惟以一死報國賊怒焚之事
聞特贈保義郎閤門祇候

鄭振字亨叔興化軍仙遊人建炎中盜楊勅起振糾集
民兵禦之賊遁去自是屢破羣盜郡縣知名紹興十六
年盜詹鐵又入振井里振帥眾拒之殺數十人倉猝遇

害

王師道字居中兗州人任吉州粟傳砦巡檢紹興中與盜戰於吳村每射輒斃追擊數里遇伏力戰死事聞官其二子又有王輝者貴州人亦嘗為粟傳砦巡檢靖康初詔起義兵輝應募立奇功官至正使寓吉州淳熙二年茶寇犯郡以輝驍勇檄之使行至勝鄉地險輝勇於進士卒不繼為賊所得輝含血大罵遂死贈忠州刺史

史

楊震仲字革父成都府人登淳熙二年進士第知閬州
新井縣辟興元府通判權大安軍吳曦叛檄招之震仲
辭疾不行時軍教授史次泰亦被檄謀於震仲震仲曰
大安為西蜀第一州若首從其招則諸郡風靡矣顧力
不能拒義死之教授非城郭臣且有母在脫去為宜因
屬次泰曰吾死以匹絹纏身斂以小棺足矣曦遣興州
都統司機宜郭鵬飛代震仲趣行益急遂飲藥死次泰
如其言斂而寘於蕭寺鵬飛迫次泰行次泰自塗其目

其母聞之命家人以計聞乃還明年曦伏誅詔贈震仲朝奉大夫直寶謨閣謚節毅官其二子次秦改秩為利路主管文字有郭靖者高橋土豪巡檢也曦之叛階成和鳳四州之民避兵者順嘉陵而下過大安軍楊震仲計口給粟撫之境內無一餒者及震仲死曦盡驅之使還靖在其中行至白崖關告其弟端曰吾世世為王民自金人來侵避難入關今為曦所逐願死於此為趙氏鬼遂赴江而死

陳霖字傳容泉州人嘉定十三年進士為瑞金尉盜起江閩霖力戰被執不屈遇害

胡斌為殿前司將官戍邵武紹定三年江閩寇作斌將弱卒數百奮身迎戰格殺甚衆賊益生兵官軍僅存數十人或告以衆寡不敵盍避之斌曰郡民死以萬計其生者數千人由東門出我不綴其勢使得脫走則賊躡其後無噍類矣遂大呼曰我死救百姓兵盡矢窮遂遇害其屍僵立移時始仆事聞贈武節大夫錄其後一

人

高談字景遂邵武光澤人紹定二年旁郡盜作諸子請避之談不聽明年盜入境諸子又請談曰有廟祏在將焉之盜至談出詰之盜怒執諸庭其家贖以牛酒金帛皆不釋談曰然則將何為盜曰我欲東破武陽若得耆老如爾者率是鄉子弟吾其濟乎談曰斯言奚為至我唾賊大罵遂遇害里人賴以免

孫益揚州泰興人紹定中李全犯揚州游騎薄泰興城

下縣令王燭募人守禦益起從之俄賊兵大至益率衆
拒戰厲聲呼曰王令君募我輩來將以守護城邑也今
賊至城下不為一死何面目見令君乎遂身先赴敵死
之同時顧緒顧珣俱戰死事聞贈益保義郎緒珣承節
郎各官其子一人

王大壽泉州人為左翼隊將紹定五年海寇王子清犯
圍頭郡守真德秀遣大壽領卒百人出防猝與賊遇控
弦斃賊十餘人後無援者遂沒從死者五人賊就俘剖

心祭之事聞贈官恤其家

侯畱字道子温州樂清人以武舉授合浦尉歷柳城令
步軍司幹辦公事侍衛馬軍行司計議官寶祐五年制
置使賈似道辟通判海州兼河南府計議官李松壽據
山東突出連泗高廩戰城下死之闔室遇害謚節獻

王孝忠為鎮江前軍統制兼淮東路分戍淮陰楊貴叛
孝忠率衆迎戰俄水軍統制朱信降賊孝忠孤軍不敵
死焉

陳東字少陽鎮江丹陽人以貢入太學欽宗即位伏闕
上書請誅蔡京梁師成李彥朱勔王黼童貫六人以謝
天下言極憤切明年金人逼京師東又請誅六賊時梁
師成尚留禁中東發其前後姦謀乃謫死李邦彥議與
金和李綱及种師道主戰邦彥因小失利罷綱且割三
鎮東率諸生伏宣德門下上書請用綱而斥邦彥等軍
民從者數萬舁登聞鼓搗壞之喧呼震地於是亟詔綱
入復領行營金人既解去學官觀望時宰議屏伏闕之

士先自東始京尹王時雍欲盡致諸生於獄人人惴恐
朝廷用楊時為祭酒復東職然後定吳敏欲弭謗議奏
補東官賜第除太學錄東力辭以歸高宗即位五日相
李綱又五日召東至未得對會綱去乃上書乞留綱而
罷黃潛善汪伯彥不報請親征以還二聖車駕勿幸金
陵又不報會布衣歐陽澈亦上書言事潛善遽以語激
怒高宗言不亟誅將復鼓衆伏闕書獨下潛善所府尹
孟庾召東議事東請食而行手書區處家事授其從者

曰我死爾歸致此於吾親食已如廁吏有難色東笑曰
我陳東也畏死即不敢言已言宥逃死乎吏曰吾亦知
公安敢相迫頃之東具冠帶出別同邸乃與澈同斬于
市東初未識網特以國故至為之死越三年高宗感悟
追贈東澈承事郎紹興四年並加朝奉郎祕閣修撰官
其後二人

按陳東以下諸人俱以言事死義
仍宋史舊例附於凡死事者之後

歐陽澈字德明撫州崇仁人靖康初應制條澈政陳安
邊禦敵十策州未許發退而復采朝廷之闕失政令之

非違可以為保邦御俗之方去蠹國殘民之賊者十事
復為書并上聞已而又論列十事並言臣所進三書實
為切要會金人南下汴京城破乃徒步走行在高宗初
即位激伏闕上封事極詆用事大臣與陳東俱見殺
馬伸字時中東平人紹聖四年進士為成都郫縣丞崇
寧初范致虛攻程頤為邪說下河南府盡逐學徒是時
伸註西京法曹欲依頤門以學頤固辭之卒受中庸以
歸靖康初以孫傳薦召赴京師御史中丞秦檜迎辟之

擢監察御史及汴京陷金人立張邦昌脅百官推戴衆
唯唯伸獨奮曰吾職諫爭忍坐視乎乃與御史吳給約
秦檜共為議狀乞存趙氏復嗣君位邦昌既僭立伸首
具書請速迎奉元帥康王銀臺司視書不稱臣辭不受
伸叱曰吾今日不愛一死爾欲吾稱臣耶即繳申尚書
省以示邦昌邦昌得書氣沮明日議迎哲宗后孟氏垂
簾追還偽赦乃遣馮解李回等迎康王高宗即位伸拜
章以城陷不能救主遷不能死當就竄削帝知其忠擢

殿中侍御史撫諭荆湖廣南復請誅邦昌并其黨王時雍等及所過州縣察吏賢否與民利疚以次列上於朝伸至湖廣朝廷方召孫覲謝克家乃奏覲克家趨操不正在靖康間與王時雍王及之等七人結為死黨附耿南仲倡言不主和議者則執送金人覲受金人女樂草表媚之乃負國之賊宜速遠竄不報伸又進疏歷數黃潛善汪伯彥罪狀望速罷政柄別選賢者共圖大事疏入留中明日改衛尉少卿伸以論事不行辭不拜錄其

疏申御史臺且言臣言可采即乞施行若非是合坐証
罔之罪於是詔伸言事不實責濮州監酒稅時用事者
恚甚必欲殺之以濮迫寇境故有是命伸怡然襪被而
行死道中明年金人陷廣陵潛善伯彥以誤國竄陞臺
臣奏伸嘗論潛善等罪復以衛尉少卿召寶未知其存
亡也紹興中詔贈諫議大夫

呂祖儉字子約祖謙之弟也受業祖謙如諸生始仕監
明州倉將上會祖謙卒部法半年不上者為違年祖儉

固請終期喪朝議贈之詔違年者以一年為限自祖儉服除更赴銓丞相周必大語尚書尤袤招之祖儉已調衢州法曹而後往見尋以薦召除籍田令歷司農簿乞補外通判台州寧宗初除太府丞時韓侂冑寢用事正言李沐論罷右相趙汝愚祖儉奏汝愚即不能無過然未至如言者所云侂冑怒曰呂寺丞乃預我事耶會祭酒李祥博士楊簡皆以訟汝愚劾罷祖儉乃上封事極言其非疏既上有旨安置韶州會樓鑰進讀呂公著元

祐初所上十事因言如公著社稷臣猶將十世宥之前
日太府寺丞呂祖儉以言事得罪者其孫也今投之嶺
外有辜聖朝恩禮臣竊為陛下惜之帝問祖儉所言何
事然後知前旨不由中出適有為仇胄計者謂自趙丞
相去天下已切茲今又投祖儉瘴鄉必致于死則怨益
重曷若少徙內地仇胄悟得改吉州遇赦量移高安二
年卒詔許歸葬方祖儉之謫也其從弟祖泰字泰然徒
步往省之留月餘語其友王深厚曰我雖無位義必以

言報國當少須之今未敢以累吾兄也及粗儉沒貶所
嘉泰元年值周必大降少保致任祖恭憤之乃請登聞
鼓院上書論侂胄有無君之心請誅之以防禍亂其畧
曰丞相趙汝愚今之有大勲勞者也侂胄首逐之特從
彭龜年陛下舊學之臣也侂胄亟去之若其徒蘇師旦
特平江之吏胥假潛邸而得節鉞周均韓氏之廝役以
皇后親屬得大官不識陛下在潛邸時果識師旦乎椒
房之親果有均乎凡侂胄之徒自尊大而卑朝廷一至

于此願亟誅侂冑而罷逐其徒獨有周必大可用宜以代之不然事將不測書出中外大駭有旨杖之百配欽州牢城收管祖泰自顧必死冀以身悟朝廷無懼色既貶道出潭州錢文子為醴陵令私贖其行乃匿襄郢間及侂冑誅朝廷訪得祖泰所在詔雪其冤特補上州文學改授迪功郎監南嶽廟喪母無以葬至都謀於舊識得寒疾不愈索紙書曰吾與兄共攻權臣今權臣誅吾死不憾獨吾生還無以報國且未能葬母為可憾耳乃

卒京尹王祐為成斂歸葬焉

楊宏中字充甫福州人弱冠補國子生當右丞相趙汝愚之罷國子祭酒李祥博士楊簡連疏爭拔俱被斥逐宏中曰師儒能辨大臣之寃而諸生不能留師儒之去於誼安乎衆莫應獨林仲麟徐範張衡蔣傅周端朝五人願預其議遂上書曰自古國家禍福之由初非一道惟小人中傷君子其禍尤慘君子登庸杜絕邪枉其心實在於愛君憂國小人得志仇視正人必欲空其朋類

然後可以肆行而無忌於是人主孤立而社稷危矣臣
竊見近者李沐論前宰相趙汝愚數談夢兆擅權植黨
將為不利以此加誣蒙蔽天聽中外咨憤章頴力辨其
非首遭斥逐聞者已駭祭酒李祥博士楊簡相繼抗論
毅然求去同日報罷六館之士為之憤惋涕泣今李沐
自知邪正之不兩立而公議之不直已也乃欲盡去正
人以便其私於是指託朋黨以罔陛下臣恐君子小人
消長之機於此一判則靖康已然之監豈堪復見於今

日耶願陛下特奮睿斷明示好惡竄李沐以謝天下還
祥簡以收士心臣雖身膏鼎鑊實所不辭書奏六人皆
編置以宏中為首天子號為六君子嘉泰三年寧宗幸
學特旨放還開禧元年宏中登進士第教授南劍州及
侂冑誅先以言得罪者悉加褒錄特遷宏中一秩尋以
薦授戶部架閣歷太學正改武學博士時諫官應武論
一學官宏中季試策士及其故武銜之會秋戌祀武成
王故事祭酒行事博士攝亞獻至是不命宏中宏中爭

之於是武劾宏中與同例競且謂其激矯不自愛遂通
判潭州以親老請祠差知武岡軍未受卒端朝字子靜
嘉定三年試禮部第一終刑部侍郎兼侍講衛字用叟
以父任補官仲麟字景仲傳字象夫久居學校忠鯁有
聞咸以不偶死範自有傳

華岳字子西貴池人為武學生上書忤韓侂胄下大理
貶建寧園土中郡守傅伯成憐之命獄卒使出入毋繫
伯成去又迂守李大異復寘獄侂胄誅放還復入學登

嘉定武科第一

按岳為貴池人及登嘉定武科第一宋史不詳今據岳所著翠微南征錄增入

為殿前司官屬謀去丞相史彌遠事覺下臨安獄獄具坐議大臣當死寧宗知岳名欲生之彌遠曰是欲殺臣者竟杖死於東市

鄧若水字平仲隆州井研人吳曦叛州縣莫敢抗若水方為布衣憤甚將殺縣令起兵討之不果乃伏劍徒步如武興欲手刃曦中道聞曦死乃還登嘉定十三年進士第時史彌遠柄國久若水對策極論其姦考官寘之

末甲策語播行都士爭誦之理宗即位應詔上封事謂
行大義然後可以弭大謗收大權然後可以固大位除
大姦然後可以息大難反覆數百言制置司不敢為附
驛卻還之以格當改官奏上彌遠取筆橫抹之而罷嘉
熙間召為太學博士當對復草奏數千言大畧謂先帝
不得正其終陛下不得正其始臣請發史彌遠家斷棺
取其屍斬之以謝在天之靈將對前一日假筆吏於所
親潘允恭允恭諭筆吏竊錄之懼并及禍走告丞相喬

行簡亦大駭翼日蚤朝奏出若水通判寧國府退朝召
閤門舍人問曰今日有輪對官乎舍人以若水對行簡
曰已得旨補外矣可格班若水袖其書待廡下舍人諭
使去若水泐泐而退到官數月竟以言罷遂不復仕賈
似道在京湖聞其名辟參軍事若水雅思其鄉乃起從
其招因西歸蜀居山中有盜夜劫之若水危坐不動盜
擊其首流血被面亦不動乃舍去有一子膂力絕人築
山砦以兵捍衛鄉井砦破舉家遇害

欽定續通志卷五百十一